

Nvit inaugurazion mostra

Chronos & Kronos

La misura dl Tëmp y l tëmp dla Vita

Tla mostra speziela *Chronos & Kronos: La misura dl Tëmp y l tëmp dla Vita* tl Museum Gherdëina iel metù ora n vint portaëures ziplëi tl lën, la majera pert ora dla culezion dl Museum o mprestei per ntant da culeziunisc privac, y crisc ora aldò dla formes, di motives y dl tëmp de produzion de chisc pec particulères, che va plu o manco dal ultim chert dl 18ejim nchin ala metà dl 19ejim secul.

L'ëures à senià l passé via di avvenimënc, les à regulà i ritms dla vita y dl'azions y les ie nce states simbui de paruda dl bensté y dl prestisc soziel.

L'esposizion nes dà la puscibltà de prijé la cualità tecnica y l valor storich-artistich de chisc portaëures; defati, ie n valguni la esprescion de speculazions y reflacions sapientes, d'autri, alincontra, à n stil scëmpl ma a uni moda elegant, coche per testimonii tan mpurtant che fova l „sëniatëmp“ nuef y l manufat che l teniva su per l mustré ca tla stua.

L'imaja che vën dant l plu suvënz ie chëla dl Tëmp che vën rafigurà tla forma alegorica de n vedl cun la eles y da na berba, cun n drap che ti cuer ju la pertes intimes. Daujin a d'ël àl suvënz na fauc dal mane lonch o na sëijela, simbui de Kronos/Saturn, l die dl'agricultura y dla rededa, cun chël che l'iconografia dl Tëmp se cumbinea.

Al'azetazion dl passé dl tëmp se liëia nce d'otra figures mitologiches che nrichësc la decorazion estetica dl portaëures, coche Mercur, Minerva o Ercul.

La prejënza dla crëusc cristiana te chësta mostra ne ie nia n cajo, ajache la tematica dl Tëmp à da nfé cun la mort. Sëurapro iel metui ora d'autri pitli ogeg nteressanc relazionei al Tëmp y ai cunzec dl *memento mori* y dla *Prudënza*.

La mostra cureda dala Dott.ssa Danila Serafini ie da udëi tla sala sculptures dl Museum Gherdëina y fej pert dl proiet di Cunsëies de Furmazion de Gherdëina „Dé Tëmp al tëmp“.

N ucajon dla giaurida ai 8 de juni dala 18:00 tla Cësa di Ladins saral da audì na relazion dla Dott.ssa Danila Serafini sun la iconografia dl Tëmp.

Deplù nformazions giapëis da Paulina Moroder, diretëura dl Museum Gherdëina, tel. 0471 797554 o 338 6040477, e-mail: p.moroder@museumgherdeina.it